

txoritxoari mokoka

Amagoia Iban

Apirila eta abendua

Iragan apirilean, Hugo Chavezen aurkako altxamendua telebisatu ziguten, estatu kolpea zenari bere izenez deitzeko ausardiarik inor gutxik izan zuen arren. Chavezen aldekoak haren aurkakoen kontra tiroka aritu zirela esanez azaldu zuten altxamendua askok. Gerora, bertsio hori gutxienez eztabaidagarria zela jakin genuen. Hemezortzi hildako eta hogeita hamar bat zauritu, finean. Zortzi hilabete pasatu dira ordutik, eta beste tiroketa bat telebisatu digute handik. Chavezen aurkako bosgarren



EGUNKARIA
Hugo Chavez, Venezuelako presidentea.

greba egunak, ostiralean, hiru hildako eta hamasei zauritu utzi zituen Caracasko kaleetan; grebaren deitzaileak beraiek etendako Elkarriketa eta Akordio Mahaiaren bidea berriro zabaltzeaz mintzatzen hasita zeudenean, Venezuelako gerra zibila pizteko gai izan omen daitekeen tiroketa bat gertatu zen kameren aurrean. Ederki asko dakigu oposizioak zer dioen, besterik ez dugulako entzuten ia-ia. Chavezen aurkakoen esku dauden RCTV, Venevision, TeleVen, Globovision eta CMT kateetatik edaten dute ikusten ditugun kronika gehienek. Informazioa kontrastatzeak pinportak eragiten dizkie kazetari batzuei, nonbait. Teleikusleoi ere bai halakoak ikusteak.

LABURAEAN

Ika-mika handia piztu du bart TVEk Aznar Espainiako presidenteari egindako elkarriketak

Bart Jose Maria Aznar Espainiako presidentea Espainiako lehen katean azaldu zen *Prestige* petroliontzia eragindako hondamendiari buruzko azalpenak ematen. Oposizioak, oro har, eta Espainiako beste hedabideetako zenbait arduradunek kritika garratzak egin dizkiote TVEri, «hitzartutako elkarriketa» antolatzeagatik.

ETB1 'ETB 20 URTE'

'Bai euskarari' jaialdia gogoratuko dute saio berezi batean

1998an, XXI. mendeko akordioa: *Bai Euskarari* kanpainaren barruan egin zen *Bai Euskarari* jaialdi erraldoia ekarriko dute gogora gaur ETB1eko *ETB 20 urte* saioan. 1998ko udazkenean teknologiak Donostia, Bilbo, Gasteiz, Iruñea eta Miarritzeko futbol zelaia lotzea lortu zuen euskararen aldeko jaialdi erraldoia egiteko. Edurne Ormazabalek aurkeztuko du saioa, 16:10ean.

ETB1 'POSTDATA'

Euskal kostaldeak XVII. mendean zuen itxura erakutsiko dute

Euskal Herriko antzinako kostaldearen irudia berreskuratu du ETB1eko *Postdata* tarteak. Pedro Texeira kosmografo portugaldarren atlasaren berri emango dute 14:40ean.

ETB2 'FORUM'

Jaioberriei egiten zaizkien azterketak hizpide

Jose Arena pediatra izango da gaur David Barberorekin, haur jaioberriei egiten zaizkien azterketa medikuei buruz hitz egiteko.

ARROSA. 'Ostarteko balkoia' magazinari harrera ona eman diote irrati emisoreetan



JUNAN RUIZ / ARGAZKI PRESS
Gasteizko Hala Bedi irrati estudioa.

Arrosako lehen ekoizpena uhinetan da

Ekoizpen zentroaren saioa egunero entzun daiteke bertako bazkide diren zazpi irrati

Xabier Martin | DONOSTIA

Andoingo Martin Ugalde Kultur Parkean kokatu den Arrosa Irrati Ekoizpen Zentroan egin dako lehen produktua irrati uhinetan da jada. *Ostarteko Balkoia* magazina, erakunde horretako bazkide diren zazpi irrati emisoretan entzun daiteke. Astelehenerik ostiralerako Xiberoko Botza, Hala Bedi, Antxeta, Gure Irratia, Irulegiko Irratia, Txolarre Irratia eta Zintzilik Irratian ematen dute arratsalde partean Arrosan egindako magazina.

Aitziber Perez de Karkamo eta Mikel Peruarena dira *Ostarteko Balkoia* saioko esatariak.

«Magazina urriaren 21ean eskaini zuten estreinakoz irratiak; Euskal Herriaren bizitza sozio-kulturala du ardatza saioak», esan dio EGUNKARIARI Aitziber Perez de Karkamok. Hala Bedi Irratiak arratsaldeko 15:00etan ematen du magazina eta gainontzeko guztiek arratsaldeko 16:00etan, «magazina arratsaldeko ordutegiari begira eginda baitago».

Kolaboratzaile sare zabala

Arte, literatura, mendia, informatika, musika, antzerkia, filosofia, zinemagintza, ekologia eta beste zenbait gairen inguruan informazio gaurkotua es-

kaintzeko *Ostarteko Balkoia*-n kolaboratzaile mordoak hartzen du parte. Xabier Portugalek, Natxo Rodriguezek, Andoni Arabaolazak, Aitziber Yeraik, Fermin Sanchezek, Joseba Lazkanok, Fito Rodriguezek, Mikel Ayllonek eta Iñaki Barcenak gai horiekin, guztiekin, lotutako osagaiak jorratzen dituzte magazinean.

«Zerbitzari informatikoa martxan jarri ostean gainontzeko irrati bazkideek ere emango dute magazina», azaldu du Perez de Karkamok. Kazetariaren ustez, «erronka tekniko handia» dute aurrez aurre. Euskal Herri osoko osagaiak jorratzen saiatzen dira antza, «baina orekari eustea zaila da askotan». Esatariak gaineratu du ekoizpenarekin, oro har, pozik daudela irratiaren.

ESANAK



AITZIBER PEREZ DE KARKAMO

('Ostarteko Balkoia' saioko esataria)

«Oraindik goiz da jakiteko irrati entzuleen iritzia, baina irrati emisoreetan behintzat, pozik daude»

«Gainontzeko irratiaren ere eskainiko dute saioa, baina zerbitzaria martxan jarri ostean»

«Magazina bukatu eta handik ordubetera egon behar du irrati emisoreetan; erronka tekniko handia da»

«Ordubeteko iraupena dauka magazinak, eta arratsaldean emateko egina dago»

«Kolaboratzaileek ilusio handia daukate eta ulertzen dute proiektu baten hasiera dela»

«Euskal Herri osoko gaiak jorratzen ditugu, eta orekari eusten saiatzen gara, maiz zaila den arren»